

Arlef a pro DE FIESTE

La Agenzie a met a disposizion dai ents locâi des provinciis di Udin, Pordenon e Gurize 40mil euros pe celebrazion de Fieste de Patrie dal Friûl.



La Arlef (Agenzie regionâl pe lenghe furlane), inte suaze dal program anuâl aprovât di pôc de Zonte regionâl, e sosten la realizazion di manifestazions culturâls pe celebrazion de "Fieste de Patrie dal Friûl" (ai 3 di Avrîl dal 2017) de bande di ents locâi in colaborazion cu lis Pro Loco e altris sogjets publics e privâts cence fins di vuadagn o a fins mutualistics, metint a disposizion un totâl di 40mil euros. A puedin acedi a chei stes, ducj i ents locâi che a àn la lôr sede legâl

intun dai comuns des provinciis di Gurize, Pordenon e Udin. Pe celebrazion de "Fieste de Patrie dal Friûl", si puedin finanziâ chestis ativitâts culturâls finalizadis a ricuardâ e a valorizâ lis origins, la culture e la storie di autonomie dal popul furlan: iniziativis indreçadis a fâ cognossi e a aprofondî la lenghe, la storie e la culture furlanis, fasint partecips sore dut i zovins; iniziativis indreçadis a difondi la cognossince e l'ûs dai diviers struments linguistics e informatics esistents,

tant che il Grant dizionari bilingâl talian-furlan o il Coretôr ortografic furlan; iniziativis indreçadis a fâ cognossi la literature e la editorie in lenghe furlane; raprezentazions teatrâls e concerti musicâi di cualitât in lenghe furlane; acust e difusion di bandieris dal Friûl. Dai 40mil euros, 10mil a son destinâts aes iniziativis culturâls proponudis des Provinciis furlanis (Gurize, Pordenon e Udin); 5mil euros a son pes iniziativis culturâls dai Comuns capitâl dal Friûl (Gurize, Pordenon e Udin); 25mil euros a son destinâts aes iniziativis culturâls di chei altris ents locâi. Lis ativitâts culturâls a puedin jessi fatis, dai 20 di Març ai 15 di Avrîl dal 2017, di un sôl ent locâl o di agregazions di ents locâi. L'an passât, cun 30mil euros a disposizion, i projets finanziâts a son stâts une trentine.

Il bant, il regolament e i modui si puedin scjariâ dal sît de Agenzie: www.arlef.it/it/bandi-gare-avvisi/2017.

Lis domandis a varan di rivâ, dentri dal tiermin perentori dai 8 di Març dal 2017, dome cun spedizion vie PEC ae direzion: arlef@certgov.fvg.it. Par nisun motif si cjaparan in considerazion domandis che a vesin di rivâ di là di chel tiermin, o sedi secont altris modalitâts.



iffriuli@iffriuli.it

ONDE FURLANE

Une Zornade furlane dai dirits in radio

Ai 27 di Fevrâr al cole l'inovâl de Joibe Grasse dal 1511, un dai tancj moments de storie là che il popul furlan al à mostrât dignitât e cussience di se, in particolâr pe difese dai "dirits antic" des comunitâts rurâls. Di passe dîs agns, par iniziative di Radio Onde Furlane, chê ricorence e je diventade la Zornade Furlane dai Dirits.

Ance chest an la "Zornade" e vignarà memoreade su lis frecuencis de "radio libare dai furlans" (90 Mhz te plui part dal Friûl, 90.2 Mhz in Cjargne e www.ondefurlane.eu) cuntune programazion speciâl, là che a saran rubruchis specificis e si fevelarà dai dirits des comunitâts furlane, slovene e todesce di chenti e di dirits e lavôr in Friûl, cui intervents di diviers di lôr, a tacâ di **Gianpaolo Roccasalva**, **Roberto Muradore**, **Diego Navarra**, **Lorenzo Fabbro**, **Valerio Piller Roner** e **Antonio Banchig**.

SCOLTADIS DI DRIUS

Simpri plui vecjo

Gno nono Zuan: "O soi cussì curiôs che mi larès al cûr di savè ce gûst che si prove a diventâ in mò plui vecjo"



Maman!

LA PRIME TRASMISSION DUTE PAR FURLAN, PAI FRUTINS E PES FAMEIS
par cure de Agenzie Regional pe Lenghe Furlane

Ogni vinars aes 17.45 su TELEFRIULI

In repliche:
miercus aes 17.45 e domenie aes 7.15

www.arlef.it

ARLEF
 agenziearlef
 telefriuli

Dentri vie tu poderàs vivi lis aventuris dai OMENUTS, i cartons animâts che a fevelin in marilenghe

cun **Daria Miani** e tancj ospits in ogni pontade